

15 DEC 1999

MENTERI BESAR BUAT LAWATAN SAMBIL BERTARAWIH KE SELURUH DAERAH

ALOR SETAR, 15 Dis (Bernama) -- Menteri Besar Datuk Syed Razak Syed Zain Barakbah bersama-sama anggota exconya yang baru dilantik akan menunaikan solat tarawih di masjid setiap daerah di negeri ini mulai hari ini.

Anggota Exco kanan Datuk Zainol Mohamed Isa hari ini berkata, program itu bermula pada malam ini di Masjid Pekan Serdang, Bandar Baharu.

Solat tarawih itu akan disertai oleh Menteri Besar dan semua anggota exco yang beragama Islam semasa lawatan mereka ke setiap daerah.

Lawatan ke setiap daerah itu dilakukan oleh Menteri Besar dan Exco-exconya bagi mendekatkan diri mereka dengan rakyat setelah dilantik menerajui kepimpinan kerajaan negeri yang baru.

Beliau berkata memandangkan pelantikan Menteri Besar dan anggota exco dibuat pada bulan puasa, program lawatan itu terpaksa diadakan pada waktu malam di samping dapat menyempurnakan ibadah solat tarawih bersama-sama masyarakat tempatan.

Katanya, program lawatan itu akan diadakan dua hari sekali sehingga selesai lawatan mereka ke sembilan daerah dan dijangka diakhiri di daerah Kubang Pasu dengan majlis berbuka puasa dan solat tarawih bersama-sama Perdana Menteri Datuk Seri Dr Mahathir Mohamad.

-- BERNAMA

MN AKD